

Penggunaan Dakwat Kekal Akan Diwartakan 15 Februari Ini
mStar Online
Februari 09, 2012
Oleh IWAN SHU-ASWAD SHUAIB

KUALA LUMPUR: Penggunaan dakwat kekal pada pilihan raya umum ke-13 (PRU-13) akan diwartakan pada 15 Februari ini, kata Pengerusi Jawatankuasa Pilihan Khas Penambahbaikan Pilihan Raya (PSC), Datuk Seri Dr Maximus Johnity Ongkili.

Beliau berkata, ia merupakan antara cadangan-cadangan yang akan dilaksanakan dalam PRU-13 dan PSC telah menerima laporan balik daripada Suruhanjaya Pilihan Raya (SPR).

"Laporan interim telah diperakui oleh SPR untuk dilaksanakan secepat mungkin.

"Penggunaan dakwat kekal sudah di peringkat terakhir dan menunggu saja ia untuk diwartakan sebelum ia selesai dan siap sedia untuk dilaksanakan," katanya kepada pemberita selepas mesyuarat bersama PSC dan SPR di Parlimen di sini, Khamis.

Penggunaan dakwat kekal merupakan antara tujuh cadangan yang akan dilaksanakan oleh PRU-13 di mana sebelum ini 10 cadangan dalam laporan awal oleh jawatankuasa itu telah dibahas dan diterima oleh Parlimen.

Maximus berkata, selain itu orang kelainan upaya (OKU) juga boleh mendapatkan wakil mereka untuk membantu untuk mengundi.

"Wakil mereka perlu mempunyai pertalian keluarga untuk membantu membuat pengundian," katanya.

Menurut Maximus, antara lain yang diterima oleh SPR adalah tiada bantahan dalam penamaan calon dan tiada "cooling off period" atau tempoh tenang untuk calon yang bertanding.

"Ini memerlukan perubahan pada peraturan. Secara automatik, calon tidak boleh menarik diri. Kita mahu calon yang benar-benar serius.

"(Perkara) ini dijangka selesai pada minggu pertama April.

"Dengan ini, diharapkan ia dapat dilaksanakan pada PRU-13 akan datang," katanya lagi.

Hakcipta Terpelihara © 1995-2012 Star Publications (Malaysia) Bhd

Source:

http://mstar.com.my/berita/cerita.asp?file=/2012/2/9/mstar_berita/20120209183201&sec=mstar_berita